

庶徵典第三十八卷

星變部彙考十二

宋

武帝永初元年十月熒惑犯進賢十一月犯填星十二月月犯熒惑及斗

按宋書武帝本紀不

載按天文志永初元年十月辛丑熒惑犯進賢占曰進賢官誅十一月乙卯熒惑犯填星於角占曰爲喪大人惡之一曰兵起十二月庚子月犯熒惑於亢占曰爲內亂一曰貴人變角爲天門亢爲朝廷三年五月宮車晏駕七月太傅長沙景王道憐薨索頭攻略青司竟三州於是禁兵大出是後司徒徐羨之尙書令傅亮領軍謝晦等廢少帝內亂之應永初元年十二月甲辰月犯南斗占曰大臣憂三年七月長沙王薨索虜寇青司二州大軍出救

永初二年六月太白晝見熒惑犯氐房十月太白犯填星

按宋書武帝本紀不載

按天文志二

年六月甲申太白晝見占爲兵喪爲臣強三年五月宮車晏駕尋遣兵出救青司其後徐羨之等秉權臣強之應也又按志六月乙酉熒惑犯氐乙巳犯房占曰氐爲宿宮房爲明堂人主有憂房又

爲將相將相有憂氏房又兗豫分三年五月宮車晏駕七月長沙王薨王領兗州也景平元年廬陵王義真廢王領豫州也 又按志十月太白犯填星於亢亢兗州分又爲鄭占曰大星有大兵金土合爲內兵三年索頭攻略青冀兗三州禁兵大出兗州失守虎牢沒

承初三年正月月犯斗二月星孛於虛危填星犯亢三月月犯斗五月少帝卽位月犯軒轅六月犯房犯歲星七月熒惑犯執法十月太白犯斗十一月星孛於室壁月犯亢氏熒惑犯房 按宋書少帝本紀三年五月帝卽位冬十一月戊午有星孛於營室 按天文志三年正月丁卯月犯南斗占同元年一曰女主當之二月辛卯有星孛於虛危向河津掃河鼓占曰爲兵喪五月宮車晏駕明年遣軍救青司二月太后蕭氏崩 又按志二月壬辰填星犯亢占曰諸侯有失國者民多流亡一曰廷臣爲亂亢兗州分又爲鄭其年索頭攻圍司兗兗州刺史徐琰委守奔敗司州刺史毛德祖距守陷沒緣河吏民多被侵略 又按志三月壬戌月犯南斗占同正月五月丙午犯軒轅占曰女主當之六月辛巳月犯房占曰將相有憂豫州有災癸巳犯歲星於昴占曰趙魏兵飢其年虜攻略青兗司三州廬陵王義真廢王領豫州也二月太后蕭氏崩元嘉三年司徒徐羨之等伏誅 又按志九

月癸卯熒惑經太微犯左執法己未犯右執法占悉同上十月癸酉太白犯南斗占曰國有兵事大臣有反者辛巳熒惑犯進賢占曰進賢官誅明年師出救青司景平二年徐羨之等廢帝徙王元嘉三年羨之及傅亮謝晦悉誅 又按志十一月戊午有星孛於室壁占曰爲兵喪明年兵救青司二月太后蕭氏崩營室內宮象也 又按志十一月癸亥月犯亢氏占曰國有憂十一月戊戌熒惑犯房房爲明堂王者惡之一曰將相憂景平二年羨之等廢帝因害之元嘉三年羨之等伏誅

少帝景平元年正月星孛於壁十月孛於氏 按宋書少帝本紀景平元年正月乙卯有星孛於東壁冬十月己未有星孛於氏指尾貫攝提向大角仲月在危奎月埽天倉而後滅 按天文志正月乙卯有星孛於東壁南白色長二丈餘拂天苑二十日滅二月太后蕭氏崩十月戊午有星孛於氏北尾長四丈西北指貫攝提向大角東行日長六七尺十餘日滅明年五月羨之等廢帝 按元經傳曰星孛於氏者占云氏四星上者宿宮后妃之府有星孛焉宮闈有變之兆也

文帝元嘉元年冬十月熒惑犯心

元嘉六年夏五月太白經天十一月星晝見

元嘉七年三月太白犯歲星六月熒惑犯井鬼入軒轅月犯歲星十二月大流星抵奎壁 按宋書文帝本紀俱不載 按天文志元嘉元年十月熒惑犯心元嘉六年五月太白晝見經天七年三月太白犯歲星於奎六月熒惑犯東井輿鬼入軒轅月犯歲星十二月丙戌有流星頭如鼉尾長二十餘丈大如數十斛船赤色有光照人面從西行經奎北大星南過至東壁止其年索虜寇青司殺刺史掠居民遣征南大將軍檀道濟討伐經歲乃歸 按元經元嘉六年十一月己丑星晝見傳曰星侵日晝見象臣侵君權也

元嘉八年四月太白晝見五月犯天關東井六月熒惑入東井七月太白犯上將八月入太微犯左執法熒惑犯積尸九月流星發太微十月金土犯女月掩天關東井十二月犯鉤鈴 按宋書文帝本紀不載 按天文志八年四月辛未太白晝見在胃五月犯天關東井六月庚子熒惑入東井七月丁丑太白犯上將八月癸未太白入太微右掖門內犯左執法乙未熒惑犯積尸九月丙寅流星大如斗赤色發太微西蕃北行未至北斗沒餘光長三丈許十月丙辰金土相犯在於須女月掩天關東井十二月月犯房鉤鈴十年仇池寇漢中梁州失戍 按臨川王義慶傳元嘉六年加尙書

左僕射八年太白星犯右執法義慶懼有災禍乞求外鎮太祖詔譬之曰元象茫昧既難可了且史家諸占各有異同兵星王時有所干犯乃主當誅以此言之益無懼也鄭僕射亡後左執法嘗有變王光祿至今平安日蝕三朝天下之至忌晉孝武初有此異彼庸主耳猶竟無他天道輔仁福善爲不足橫生憂懼兄與後軍各受內外之任本以維城表裏經之盛衰此懷實有由來之事設若天必降災寧可千里逃避邪既非違者之事又不知吉凶定所若在都則有不測去此必保利貞者豈敢苟違天邪義慶固求解僕射許之

元嘉九年正月熒惑入鬼三月月犯軒轅四月犯左角歲星入羽林月犯房鉤鈴太白入積尸五月犯軒轅月奄斗熒惑犯左執法七月月蝕左角八月太白犯心

元嘉十年十月有大流星

元嘉十一年二月月犯畢暈畢畢五車參三月太白晝見閏月犯五諸侯月入井犯太白 按宋書文帝本紀俱不載 按天文志元嘉九年正月庚午熒惑入輿鬼三月月犯軒轅四月犯左角歲星入羽林月犯房鉤鈴己丑太白入積尸五月犯軒轅月掩南斗第六星辛酉熒惑入太微右掖門犯

右執法七月丙午月蝕左角八月癸未太白犯心前星乙酉犯心明堂星元嘉十年十月有流星大如鬬尾長二十餘丈元嘉十一年二月庚子月犯畢入畢口而出因暈昴畢西及五車東及參三月丙辰太白晝見在參閏月戊寅太白犯五諸侯己丑月入東井犯太白於時司徒彭城王義康專權元嘉十二年五月月犯右執法七月熒惑犯積尸掩上將十月月犯右執法十二月太白犯羽林按宋書文帝本紀不載按天文志十二年五月壬戌月犯右執法七月壬戌熒惑犯積尸掩上將十月丙午月犯右執法十二月甲申太白犯羽林十七年上將執法皆被誅

元嘉十三年正月月犯熒惑二月犯太微十一月歲星犯積尸十二月熒惑入羽林按宋書文帝本紀不載按天文志十三年正月庚午月犯熒惑二月月犯太微東蕃第一星十一月辛亥歲星犯積尸十二月戊子熒惑入羽林後年廢大將軍彭城王義康及其黨與凡所收掩皆羽林兵出

元嘉十四年正月星晝見月犯東井四月太白犯鬼五月晝見七月歲星入軒轅八月熒惑犯上將九月犯左執法按宋書文帝本紀不載按天文志十四年正月有星晡前晝見東北維在井左右黃赤色大如橘月犯東井四月丁未太白犯輿鬼五月丙午太白晝見在太微七月辛卯歲星入

軒轅八月庚申熒犯惑上將九月丙戌熒惑犯左執法其後皇后袁氏崩丹陽尹劉湛誅尙書僕射殷景仁薨

元嘉十五年四月月犯氏十月流星出文昌十一月熒惑入羽林月犯東井鉞 按宋書文帝本紀不載 按天文志十五年四月己卯月犯氏十月壬戌流星大如鴨子出文昌入紫宮聲如雷十一月癸未熒惑入羽林丁未月犯東井鉞星其後誅丹陽尹劉湛等

元嘉十六年二月歲星犯左執法五月太白晝見月入羽林太白犯畢歲星犯執法七月月會填星八月太白犯軒轅熒惑犯上將太白晝見九月犯左執法熒惑犯右執法十月水火相犯十一月熒惑犯房 按宋書文帝本紀不載 按天文志十六年二月歲星逆行犯左執法五月丁卯太白晝見胃昴間月入羽林太白犯畢歲星左執法七月月會填星八月太白犯軒轅明年皇后袁氏崩熒惑犯太微西上將太白晝見在翼九月熒惑同入太微相犯太白犯左執法熒惑犯右執法十月歲星熒惑相犯在亢十一月熒惑犯房北第一星明年大將軍義康出徙豫章誅其黨與尙書僕射揚州刺史殷景仁薨

元嘉十九年客星在北斗

按宋書文帝本紀不載

按天文志十九年九月客星見北斗漸爲彗

星至天苑末滅

按元經傳曰占曰凡客星所出有兵喪北斗帝居也臣下有陰窺神器之象

元嘉二十年流星北行

按宋書文帝本紀不載

按天文志二十年二月二十四日乙未有流星

大如桃出天津入紫宮須臾有細流星或五或三相續又有一大流星從紫宮出入北斗魁須臾又一大流星出貫索經天市垣諸流星並向北行至曉不可稱數流星占並云天子之使又曰庶民惟星星流民南散之象至二十七年索虜殘破青冀徐兗南兗豫六州民死大半

元嘉二十二年二月金火木合于井四月月犯心太白入軒轅七月晝見

按宋書文帝本紀不載

按天文志二十二年二月金木火合東井四月月犯心太白入軒轅七月太白晝見其冬太子詹事

范曄謀反伏誅

元嘉二十三年金火相爍

按宋書文帝本紀不載

按天文志二十三年正月金火相爍其月索

虜寇青州驅略民戶

元嘉二十四年正月月犯心星西流四月太白晝見

按宋書文帝本紀不載

按天文志二十四

年正月月犯心大星天星並西流多細大不過如鷄子尾有長短當有數百至旦日光定乃止有入北斗紫宮者占流星羣趨所之者兵聚其下有大急又占衆星並流將軍並舉兵隨星所之以應天氣又占流星入紫宮有喪水旱不調又占流星入北斗大臣有繫者又占流星爲民大星大臣流小星小民流四月太白晝見八月征北大將軍衡陽王義季薨豫章民胡誕世率其宗族破郡縣殺太守及縣令

元嘉二十五年火水入羽林月犯歲星太白經天

元嘉二十六年十月彗星入太微

元嘉二十七年夏太白經天九月太白犯歲星十月熒惑入太微

元嘉二十八年彗星見太白犯哭星 按宋書文帝本紀俱不載 按天文志二十五年正月水火

入羽林月犯歲星太白晝見經天二十六年十月彗星入太微二十七年夏太白晝見經天九月太白犯歲星十月熒惑入太微元嘉二十八年五月彗星見卷舌入太微逼帝座犯上相拂屏出端門滅翼軫翼軫荊州分太白晝見犯哭星三十年太子巫蠱咒詛事覺遂殺害朝臣孝建元年荊江二

古今圖書集成
州反皆夷滅卷舌咒詛之象誓之所起是其應也

元嘉二十九年太白晝見經天 按宋書文帝本紀不載 按天文志二十九年正月太白晝見經

天明年東宮弑逆

孝武帝孝建元年二月大流星西行九月熒惑犯左執法十月犯進賢 按宋書孝武帝本紀不載

按天文志孝建元年二月有流星大如月西行其年豫州刺史魯爽反誅九月壬寅熒惑犯左執法

尙書左僕射建平王宏表解職不許十月乙丑熒惑犯進賢星吏部尙書謝莊表解職

孝建二年五月熒惑入南斗十月亦如之 按宋書孝武帝本紀不載 按天文志二年五月乙未

熒惑入南斗十月甲辰又入南斗大明元年夏京師疾疫 按沈懷文傳懷文遷別駕從事史江夏

王義恭遷西陽王子尙爲揚州居職如故時熒惑守南斗上乃廢西州舊館使子尙移居東城以厭

之懷文曰天道示變宜應之以德今雖空西州恐無益也不從而州竟廢矣

孝建三年四月太白犯鬼八月入心 按宋書孝武帝本紀不載 按天文志三年四月戊戌太白

犯與鬼占曰民多疾明年夏京邑疫疾八月甲午太白入心占曰後九年大飢至大明八年東土大

飢民死十二三

大明元年三月太白犯歲星六月月掩熒惑 按宋書孝武帝本紀不載 按天文志大明元年三月癸亥太白在奎南犯歲星占曰有滅諸侯三年司空竟陵王誕反誅六月丙申月在東壁掩熒惑占曰將軍有憂期不出三年至三年司空竟陵王誕反

大明二年三月熒惑入井四月犯軒轅七月月掩軒轅十月十一月連犯軒轅熒惑犯房及鉤鈴

按宋書孝武帝本紀不載 按天文志二年三月辛未熒惑入東井四月己亥熒惑在東井犯北軒

轅第二星并雍州分其年四月海陵王休茂爲雍州刺史五年休茂反誅七月己巳掩軒轅第二星十月辛卯月掩軒轅十一月丙戌月又掩軒轅軒轅女主時民間喧言人主帷薄不修十一月庚戌熒惑犯房及鉤鈴壬子熒惑又犯鉤鈴占曰有兵其年索虜寇歷下遣羽林軍討破之

大明三年正月刀星見月犯次將三月犯鉤鈴土守牽牛四月月犯五諸侯五月歲星犯井鉞六月月入斗八月犯太白太白犯房熒惑守畢九月太白犯斗月犯熒惑十月太白犯哭星 按宋書孝武帝本紀不載 按天文志三年春正月夜通天薄雲四方生赤氣長三四尺乍沒乍見尋皆消滅

占名隧星一曰刀星天下有兵戰鬪流血月入太微犯次將占曰有反臣死將誅三月月在房犯鉤
鈴因蝕占曰人主惡之將軍死三月土守牽牛占曰大人憂疾兵起大赦姦臣賊子謀欲殺主四月
月犯五諸侯占曰諸侯誅金水合西方占曰兵起五月歲星犯東井鉞占曰斧鉞用大臣誅六月月
入南斗占曰大臣大將軍誅南兗州刺史竟陵王誕尋據廣陵反遣車騎大將軍沈慶之領羽林勁
兵及豫州刺史宗慤徐州刺史劉道隆衆軍攻戰及屠城城內男女道俗梟斬靡遺將軍宗越偏用
虐刑先劓腸抉眼或笞面鞭腹苦酒灌創然後方加以刀鋸大兵之應也八月月犯太白太白犯房
占曰人君有憂天子惡之熒惑守畢占曰萬民飢有大兵九月太白犯南斗占曰大臣有反者九月
月在胃昴犯熒惑占曰兵起女主當之人主惡之一曰女主憂國王死民飢十月太白犯哭星占曰
人主有哭泣之聲自後六宮多喪公主薨亡天子舉哀相係歲大旱民飢 按廣陵王誕傳是年五
月十九日夜有流星大如斗杵尾長十餘丈從西北來墜城內是謂天狗占曰天狗所墜下有伏尸
流血

大明四年正月月掩氐犯房五月入太微六月太白犯井鉞月犯心入斗七月歲星犯積尸十二月

月犯心刀星見月犯箕太白犯東井 按宋書孝武帝本紀不載 按天文志四年正月月奄氐占曰大將死又犯房北第二星占曰有亂臣謀其主五月月入太微占曰有反臣大臣死六月太白犯井鉞占曰兵起斧鉞用大臣誅月犯心前星占曰有亂臣太子惡之月入南斗魁中占曰大人憂女主惡之七月歲星犯積尸占曰大臣誅十二月月犯心中大星占曰大人憂十二月通天有雲西及東北並生合八所並長四尺乍沒乍見尋消盡占曰天下有兵十二月月犯箕東北星女主惡之明年雍州刺史海陵王休茂反太白犯東井雍州兵亂之應也

大明五年正月歲星犯鬼月入斗火土合於女三月月掩軒轅流星無數西行四月太白犯井鬼六月大流星出王良八月熒惑入井十月歲星犯上將太白犯亢十月入氐熒惑入井月奄上將犯歲星流星入紫宮十一月月掩心十二月太白犯建月犯左角 按宋書孝武帝本紀不載 按天文志五年正月歲星犯輿鬼積尸占曰大臣誅主有憂財寶散月入南斗魁中占曰大人憂天下有兵火土同在須女占曰女主惡之三月月掩軒轅占曰女主惡之有流星數千萬或長或短或大或小並西行至曉而止占曰人君惡之民流亡四月太白犯東井北轅占曰大臣爲亂斧鉞用太白犯輿

鬼占曰大臣誅斧鉞用人主憂六月有流星白色大如甌出王良西南行沒天市中尾長數十丈沒後餘光良久占曰天下亂八月熒惑入東井占曰大臣當之十月歲星犯太微上將星太白入亢犯南第二星占曰上將有憂輔臣有誅者人君惡之十月太白入氐中熒惑入井中占曰王者亡地大赦兵起爲飢月入太微掩西蕃上將犯歲星占曰有反臣死大星大如斗出柳北行尾十餘丈入紫宮沒尾後餘光良久乃滅占曰天下凶有兵喪天子惡之十一月掩心前星又犯大星占曰大人憂兵起大旱十二月太白犯西建中央星占曰大臣相譖月犯左角占曰天子惡之後三年孝武帝文穆皇后相繼崩嗣主卽位一年誅滅宰輔將相虐戮朝臣禍及宗室因自受害

大明六年正月月犯歲星及心二月月掩左角三月熒惑入鬼五月月在張入太微犯熒惑火犯木翼大流星出壁月掩昴七星歲星犯上將六月月入太微犯右執法月犯心七月犯箕八月入斗

按宋書孝武帝本紀不載 按天文志六年正月月在張犯歲星占曰民飢流亡月犯心後星占曰庶子惡之二月月掩左角占曰天子惡之三月熒惑入輿鬼占曰有兵大臣誅天下多疾疫五月月在張又入太微犯熒惑占曰國主不安女主憂火犯木翼占曰爲飢爲旱近臣大臣謀主有星前赤

後白大如甌尾長十餘丈出東壁北西行沒天市啾啾有聲占曰其下有兵天下亂月掩昴七星占曰貴臣誅天子破匈奴胡主死歲星犯上將占曰輔臣誅上將憂六月月入太微犯右執法占曰人主不安天下大驚主不吉執法誅月犯心後星占曰庶子惡之七月月犯箕占曰女主惡之八月月入南斗魁中占曰大臣誅斧鉞用吳越有憂明年揚南徐州大旱田穀不收民流死亡自後三年帝后仍崩宰輔及尙書令僕誅戮索虜主死新安王兄弟受害司徒豫章王子尙薨羽林兵入三吳討叛逆

大明七年正月刀星見三月月犯心四月火犯金六月月犯箕太白入井七月熒惑入井月入斗太白犯鬼八月月入哭星太白出軒轅入太微熒惑犯鬼太白犯右執法十月金水相犯熒惑守軒轅十一月歲星入氐十二月月犯五車 按宋書孝武帝本紀不載 按天文志七年正月夜通天薄雲四方合有八氣蒼白色長二三丈乍見乍沒名刀星占曰天下有兵三月月犯心後星占曰庶子惡之四月火犯金在婁占曰有喪有兵大戰六月月犯箕占曰女主惡之太白入東井占曰大臣當之太白犯東井占曰大臣爲亂斧鉞用七月熒惑入東井占曰兵起大將當之月入南斗魁犯第二

星占曰大人憂吳郡當之太白犯輿鬼占曰兵起大將誅人主憂財帛出八月月入哭星中間太白犯軒轅少民星占曰人主憂哭泣之聲民飢流亡太白入太微占曰近臣起兵國不安熒惑犯鬼太白犯右執法占曰大臣誅十月金水相犯占曰天下飢熒惑守軒轅第二星占曰宮中憂有哀十一月歲星入氐占曰諸侯人君有入宮者十二月月犯五車占曰天庫兵動後二年帝后崩大臣將相誅滅皇子被害皇太后崩四方兵起分遣諸軍推鋒外討

大明八年正月月掩鬼入斗二月犯斗四月又犯之太白入井入太微犯執法六月歲星犯氐大流星出參七月歲星入氐十月太白守房月掩房 按宋書孝武帝本紀不載 按天文志八年正月月掩輿鬼占曰大臣誅月入南斗魁中掩第二星占曰大人憂女主惡之二月月犯南斗第四星入魁中占曰大人有憂女主當之豫章受災四月月入南斗魁中犯第三星占曰大人有憂女主惡之丹陽當之太白入東井入太微犯執法占曰執法誅近臣起兵國不安歲星犯氐占曰歲大飢有流星大如五斗甌赤色有光照見人面尾長一丈餘從參北東行直下經東井過南河沒占曰民飢吳越有兵七月歲星入氐十月太白守房占曰有兵大喪月掩蝕房占曰有喪大饑此後國仍有大喪